



## Les charchoux de noms

**O**ll' y avoait ine foait in boun'houmme et ine boune femme qui n'aviant qu'ine fllaude. Thielle fllaude était assez jolie s'ous v'lez, mais alle n'avoait jamais été battue pr' eitre trop fine.

In jour qu'alle se peignait, alle fasit cheure in grous poaill de dessus sa tête ; et alle app'lit bein vite son père et sa mère pre v'ni le veure.

Eh ! v'nez donc veure, qu'alle dicit, est-el grous, ma grand foé damnaie ! i n'en ai jamoais vut in pareil ; qu'allons z'y en foaire ?

S'ous v'lez m'en craire, qu'o dicit le père, iallons le moettre dons n'ine barrique pllaine de bran de froument pre veure coumme le deveindrat grous.

Au bout de six mois, l'avait bé tant avolué, l'était bé devenu si grous, si grous que le faisait zire : si bein que le père le tuit, et avoec la piâ le fasit foaire ine belle paire de mitanes que le baillit à sa feille.

En li baillant thiellaies mitanes, le li dicit que thiau de ses galants qui devinerait en qu'eu piâ alle étiant foaites, se marierait avec lé.

Thielle gâtaie de fumelle dicit bé qu'all' au dirait à pressounne ; mais, coumme oll' y avoait in jeine freluquet qui la courtaisait d'empeux quieuque tomps,

et qu'alle aimait tout pllein meux que les autres, alle li dicit qu'oll' était de la piá de poaill.

D'auss'tout l'ondjit bein vite au dire au bounhoumme qui sit arrère bein surpris, mais qui dicit que le teindrait sa proumesse.

Le sair que le faisiant les accords, la feille ondjit à la cave pre tiraie à baire : et, coumme oll' y avait déjà in grond moument qu'alle était n'allaie et qu'a tornait pas, sa mère épationtaie ondjit veure ce qu'alle fasait.

Alle la trouvit tchupaie au ped de la barrique, la tête dans ses moins, et le vin qui coulait sous lé.

— Eh ! malheureuse, qu'alle dicit, que foais-tu itchi, d'empeux le tomps qui t'attendons ? A dèque songes-tu de laichaie thiau vin se n'allaie de moème ?

— Ah ! ma paure mère, s'ous saviez ce thi songe de moème, oll' est pas pre dire, mais oll' en vaut le cott : i songe arrère aux noms qui bailleraie à mes drôles coure ien' arai ; tous les pús jolis sont pris, et o ne rechte pús djaire avoure que dau vilains.

— Marme ! t'as ine bounne idaie : ce qu'oll' est tout de moème que d'avaie de l'esprit ! Attonds in moument i m'en vat t'aidaie jamoais in fait si bein que deux.

V'la mes deux fumelles de se moette à songeaie toutes deux, si bein que le père épationté arrivit à son tour :

— Eh ! malheureuses, que faz'an itchi mottaies toutes deux ? Vous veuillez donc pas que la barrique

s'en vat ? A dèque song'au donc de moème ? Faut qu'ous ségiez pus bêites que le bon Diù est poésant !

— I sons poé si bêites que tu crais, va ! Si tu savaie à dèque i songions toutes deux tu diraie pas thieu ; Nout'feille est la pùs fine qu'o sège pouossible de trouvaie, et i songions aux noms qu'alle bailleraie à ses dròles coure alle en arait.

Thieu n'est poé ine si mauvaise idaie, qu'o dicit le père, et pisqu'oll' est de moème i m'en vat i songeaie mé tout et o f'rat qui serons trois.

Et, pendant thiau tomps, la paure barrique s'en allait trejous.

Le galant qui était resté à la moaison, coummoincit à trouvaie le temps long : et veuiliant que pressoune ne v'nait, le vindjit veure ce que le fasiant.

— Eh ! que faz'au là tous trois ? que le dicit :

— Malheureux qu'ous z'étez ! vous veuillez donc pas que vout' barrique s'en vat ? Le diable me rompe le cou si vous z'étez pas tous trois fous arrère !

— Ah ! moun' ami, qu'o dicit le père queu chonce vous arez, d'avaie ine femme si fine que noutre feille ! Telle qu'ous la veuillez, alle est en train de songeaie aux noms qu'alle ba'rat à ses p'lits infants coure alle en arat : et sa mère et mé i liaidons à trechaie !

— Vous seriez joliment pus fins de froumaie le jau de vout' barrique et pas laiché n'allaie vout vin. Ma grond foé damnaie i vous crayaie bé bêites mais pas tant que thieu. I vous dit à reveure, coure ien, arais

trouvé trois si bêtes que vous, i retournerai me mariaie avoec vout' feille.

V'la nout gars parti, et o faut bé dire que le crayait pas sitout trouvaie soun' affoaire.

In jour que le passait dons n'in village, le trouvait ine bonne femme qui avoait in palisson qu'alle jetait dons sa chombre et apraie thieu alle tapait sa porte.

In petit moument apraie alle recoumoinçait core coumme de pus belle.

— Eh ! qu'est-o qu'ous z'avez donc à vous tracassaie de moème ma bounne femme, que l' dicit ?

— Ah ! mon bon mocieu, iai bé de la peine allez, s'ous crayez : dempeux à matin qui jaguenasse, i saie pas pûs avonçaie qu'au coummoinement. I v'laie foaire ontraie le soulail dons ma chombre, oll' y at pas moyen d'en v'ni à bout. Coure i moet thiau palisson devant ma porte, le vint dedons ; mais d'auss'tout qui le rontre, iai biâ tapaie la porte, le fouit quond même.

— Vous baillez donc pûs tant de poène ma paure criature que le dicit : laichez vout' porte uvarte, et vous veurez que le rontreat tout seul.

— Grand merci ! qu'alle dicît, mon bon mocieu, n'on veut bé, arrère, qu'ous z'étez tout pllein pus fin que les mondes de thiau long.

Thieuques jours apraie le trouvait ine bonne femme qui cougnait coumme in' onrageaie sus n'ine paure vache pre la foaire montaie à n'ine échalle

— Eh ! que faz'au là ma paure bounne femme ?

— Ma foé ! qu'alle dicit, i travaille tout mon crevé de saoul pre pas grand chouse : Vous veuillez bé thielle grouse bouillaie d'harbe sus thiauourniou ? I veudraie que ma vache la moaingisse ; mais, pas moyen de la foaire montaie la qu'ri.

— Vous n'êtes guère fine, de vous baillaie tant de traccas pre thieu ; sous z'étiez montaie la qu'ri, vous, et qu'ous li ariez baillaie, oll' arait trejous bé été pustoût foait ?

— Bé rai ! qualle dicit, ma grand foé damnaie ! vous z'êtes pas de thiau long ? o se qu'neut bé à cause qu'ous z'êtes trop fin pre thieu.

Mais v'la bé core le pus fort. In jour, dons n'in village, le trouvit ine noce lavoure que tous les mondes bramiant. Le s'éformit de ce qu'oll' y avoait, et le li dicirant que l'étiant tretous bein ennués à cause que la mariaie pouvait pas t'ontraie dons l'église pr' étandre la moesse.

— V'lau bé tretous vous taisaie ! que le dicit, oll' est pas la peine de bramaie de moême ; i vous dit qu'alle rontrerat mé ! et vous z'allez au veure.

— S'rat poé rai, que le dicirant tretous : la paure megnoune at essayé tant de faitts, qu'alle en at le front tout écorché.

— Eh bé ! vous z'allez veure, arrère !

D'auss'tout, le s'approchit de la mariaie, le la prin-djit pre la moain, et le la menit devant la porte :

— Allons, Madame la mariaie, que le dicit, fasez coumme mé, baissez la tête.

Thielle paure chétie criature en avait si bounne onvie, qu'alle fasit ce qu'alle poudjit : si bein, qu'à la fin, alle se trouvit ontraie dons l'égllice.

Tous thiellaies mondes étiant bê si contents que le saviant queu chère li foaire ce qui ne l'ompêchait pas d'être tout de même bein chagrin, à cause qu'avoure, pre teni sa proumesse, o flait que le tornisse se mariaie avoec ine fumelle qui était si poà fine.

Le se reconsolit tout de moème en songeant que le s'rait pàs tout seul à avaie une femme bête.

